

李文忠公朋僚函稿

李文忠公朋僚函稿篇目

桐城吳汝綸編輯

卷第四

正月六日上曾相

同治二年

復曾沅帥

正月十四日上曾相

同治二年

上元日致喬鶴儕都轉

同治二年

正月二十三日上曾相

同治二年

復曾沅帥

正月二十六日復李黼堂方伯

同治二年

二月四日上曾相

同治二年

二月十日上曾相

同治二年

二月望日復吳仲僊漕帥

同治二年

二月十六日上曾相

同治二年

復曾沅帥

二月二十七日上曾相

同治二年

三月四日致王少鶴少卿

同治二年

復羅椒生尙書

三月九日復劉蔭渠制軍

同治二年

三月十日上曾相

同治二年

復左季高中丞

復彭雪琴侍郎

三月十七日上曾相

同治二年

三月二十九日致薛覲堂

同治二年

四月四日上會相

同治二年

復曾沅帥

四月九日復吳仲僊漕帥

同治二年

四月十日上會相

同治二年

四月十三日上會相

同治二年

致曾沅帥

復彭雪琴侍郎

四月十四日上會相

同治二年

四月二十日上會相

同治二年

致曾沅帥

致左季高制軍

四月二十八日上會相

同治二年

復曾沅帥

復吳仲僊漕帥

復黃昌歧軍門

五月十四日復曾相

同治二年

復曾沅帥

五月二十一日復左季高制軍

同治二年

五月二十五日復曾沅帥

同治二年

五月二十九日上曾相

同治二年

六月九日上曾相

同治二年

六月十六日致曾沅帥

同治二年

上曾相

六月二十日致郭運使

同治二年

六月二十四日復吳仲僊漕帥

同治二年

六月二十五日上曾相

同治二年

復曾沅帥

李文忠公朋僚函稿卷第四篇目終

李文忠公朋僚函稿卷第四

桐城吳汝綸編輯

正月六日上曾相

同治二年

新歲伏惟助祺增勝爲祝初三日奉去臘二十六日手諭祇承一切季丈
奠金發還益深媿歎常昭初二日來稟尙在苦守誠堪焦念鈔呈台覽前
派往福山常勝軍攻陷賊兵壘三座該軍不能紮營又無官軍協守復自
撤回奧倫所部與程鎮郭松林等進攻太倉洋礮轟倒南門城垣十餘丈
該營目數人白晝樹梯登城被悍賊洋槍傷斃餘衆退回賊隊乘勢壓下
常勝軍遂潰走我軍整隊將賊擊回常勝弁勇傷亡百餘人逕回松郡崑
太兩股於除夕元旦分道來撲程學啓等一戰擊走之各營皆紮崑太嘉
定之交徐圖進取惟常熟久圍不解實無詞以謝降人潘鼎新劉銘傳皆
告奮勇將帶六營航海進紮福山以冀打通一線之路嘉湖各賊均調常

昭浦東防務少鬆另派春霆部將軍聯陞統五營守金山衛楊鼎助帶三營守張堰而令劉仲良偕潘劉往福山與昌歧鞠鏞各部師船依護進剿仍調常勝軍炸礮隊槍隊千人陸續齊進未知果有救否卽占住福山等口亦足分賊勢而固江防如潘劉至彼兵力過單鴻章祇有借雇輪船赴無爲載回兩三營徑往併紮敬祈鑒原運漕旣復東關亦隔大河有蕭毛兩軍橫截又有沅丈各營幫助似樹宇五營之去留無甚關係求吾師憫念孤軍僻遠將伯無助速放回蘇千感萬感忠逆本回蘇調兵復擾皖北有常昭固守福山再進程鎮等又各移營進逼亦足牽制上竄之勢也士會現往香港據稱同時欲赴尊處商軍事問其意云何云將會剿金陵英人與金陵蘇州賊酋頗有往來實言不諱但與國家亦相和好若漁人之利鵝蚌彼謂如准攻剿內地卽不與賊通此何說耶京倉窘乏奉旨令上海購運米二十萬石計須銀百萬兩惶急無措奈何俞斌已派黃道

查抄並無存銀

復曾沅帥

去臘十五日奉復一緘計入尊覽連奉賜示敬審新韶介祉沈從九來滬提餉適解滬四萬已先上船稟商師門先濟貴軍之急果能分用多少此非鴻章所敢知矣承屬月協三萬義不可辭惟常勝軍爲英人所脅持辨論月餘僅裁數百人每月需餉仍在五萬以外如期坐索刻不可緩滬上關稅近來因漢九開征月僅十萬以內釐捐亦不過二十萬稅項以供常勝軍五萬鎮江餉三萬軍火製造兩萬洋兵開銷又數萬釐捐則敵軍水陸十數萬松滬原部及各標營將及十萬以入抵出不敷甚鉅不得已各營均發半餉採購米糧而每石輒四五兩支應漸多咄嗟難辦而唐義渠中丞復派員坐提每月二萬絲毫無以應命昨奉 廷寄以京倉窘涸飭固根本責令鴻章籌運米二十萬石必不可缺以每石五兩計之卽須銀

百萬兩真不知從何著手海內困窮已極上海一隅著名繁富月不過三十萬耳而中外垂涎追呼日至若本省本地不用兵儘數提解戶部請爲發放可也鴻章以饑人子當暴富之名又自統兩三萬飢疲之卒實在撐持不起儻早被放黜還我窮命未始非貧而樂矣然在滬一日當竭一日之力以報我公頃與總局諸君籌商能於捐局中創一名目爲貴軍月籌萬金亦足了此心願或又謂他省抽釐此間已抽分抽錢何可再增以歛商怨俟有成議再爲奉聞常昭於十一月二十八日獻城江北傳言崑太蘇州遂已克復其實太倉內應不曾得手十二月二十八日常勝軍同程鎮舍弟各營進攻太城西人大礮轟塌城垣十餘丈洋酋率旗以登被悍賊斬落餘衆遂潰幸郭松林等整隊將賊擊回程鎮又於新正初二日擊敗竄賊忠酋率僞聽慕湖各王之衆圍攻常昭已月餘游擊周興隆降將駱國忠求援迫切斷難坐視頃派潘道鼎新劉副將銘傳移浦東守卒三

千航海赴福山進援恐不足當大股之賊蕭毛兩軍進運漕東關似無爲
不須重兵師門肯將樹字慶字等九營還我俾濟孤軍之急感且不朽程
鎮與舍弟十數營均進紮崑太之交滙松百里內除常勝軍外竟無兵置
守良可危慮然則兵之窮更甚於餉之窮也今之良臣多行不義必自斃
公姑待北岸肅清再制伏之

正月十四日上會相

頃奉正月初六日手諭謹悉一一常熟城外石營已被忠逆用洋礮轟陷
勢更危急周興隆賂國忠仍督降衆固守但北門外賊開地道恐將轟發
昌歧督令各船初旬間輪攻福山白茅徐六涇各口圍常之賊分添塔禦
常城暫少鬆耳潘劉等營聞於十二日駛抵福山不知能否上岸紮壘殊
深懸系程學啓郭松林進紮崑太之交跨河立營立足尙穩惟青浦守兵
一千嘉城二千此外遂無一兵鴻章僅留春字一營護衛張遇春尙帶該

營二百礮隊協剿福山往在上游見數萬兵調度數路猶嫌其少今則二
三百里近賊之地止此孤軍往來抽撥窮家實難當也芙蓉嶺有賊則廬
江須有防兵蔣軍如進紮柘皋扼含巢總路似勝於遠紮舒城如三河廬
江不失賊斷不能飛竄舒城也無爲五營縱不全來似可抽兩三營赴滬
有蕭毛在前城內千人似可嬰守此間如需兵過急卽請仲良乘輪船徑
往無爲調樹銘三營下駛謹先奉商昨奉去臘二十六日 諭旨令薛星
使回京候簡鴻章暫行接署通商大臣關防謝 恩疏內擬附片聲明前
議或稍遲專疏申請各國交涉太多力難兼顧本省洋務隨時籌商
處斯時地亦無推諉京倉米涸僭妄陳請湖廣江西酌量購運由輪船拖
帶過金陵再從滬換海船運津揆諸吾師體 國公忠當無刺謬惟江楚
大吏又不免嘖有煩言也許道身總理南北糧臺手無一篆呼應難靈欲
調趙守炳麟來滬籌辦京米捐運而令許道兼署常鎮敬求核示九江茶

捐可否留作沅丈軍餉

上元日致喬鶴儕都轉

昨奉惠翰敬審動履勝常秦州一席頃得漕帥來書擬委前如皋張令接
署聞其官聲甚好當能勝任湯令器識沈厚或以簡缺試之容緘請仲帥
留心位置江北各屬相距較遠未便輕議舉錯如尊處確有聞見不妨密
商漕帥匡其不逮吏治亟須整飭我輩皆當以振興人才挽回風氣爲責
任鴻章蒞滬半年得人綦難深爲愧疚吾丈久於斯土夾袋中必多妙選
無惜時時詳告爲幸常昭圍困月餘周興隆仍督降衆堅守昌歧奉各幫
師船輪擊福山楊舍徐六涇各口但能牽制賊勢昨派潘道鼎新劉副將
銘傳等統四千人往援福山未卜能否得手太倉屢攻不下敵軍俱調前
敵後路空虛良可危慮許綠仲來滬以吳璧山尙能整頓欲將朽爛大船
鐵板弁勇裁撤回粵需費一萬數千兩求爲籌濟松滬中外各軍用款繁

多實係入不敷出而水營劣卒早撤一日卽地方早受一日之福不得已商屬緣仲由敝處應分捐借四十萬內酌提借用聞現止數千金敬懇執事與緣仲籌墊速發嚴催各州縣陸續歸款此係奏定之案如有抗玩官可稟撤紳可詳參也

正月二十三日上曾相

十四日寄上一緘諒已入覽潘劉各營於十三到福山海口阻風雨四日十八九日夜登岸於福山上五里紮定營壘賊未敢偪聞於二十日進攻福山賊巢未知果得手否常昭十三日來稟尙在困守惟降衆疲乏時虞地雷轟入圍城之賊作長壘人數不過二三千分堵福山楊林白茅徐六涇各口亦不過二萬餘人昌歧仲良等精心布置或可漸次打進探聞忠逆帶聽王陳炳文二萬餘人赴金陵仍由九洲洲接應巢舍而留慕湘兩王之衆圍常昭援崑太若果確實必將出廬壽六各鄉滋擾鴻章從前在

巢含帶勇三年畧知該處形勢欲堵其西竄北竄以柘皋爲總匯扼要之區有三千精兵必可自守前請師門移蔣之純一軍進駐能見允否廬江無爲有守兵又有蕭毛二軍游擊巢湖東南斷可無慮惟西北無一勁旅守廬城之兵相去絕遠張得勝梁縣石塘橋一軍亦不甚得勁設忠逆分股竄竄皖北越廬城而西後患甚大如柘皋有兵進可合圍巢含止可遮蔽竄路似得遠勢而伐敵謀伏祈核斷速行鴻章繫懷桑梓苟有聞見敢不上陳六弟來書以師意允令樹字五營來滬調章軍接守無爲果否鴻章前與仲良議訂如福山力孤難支卽放輪船赴無爲商接三營救急若非萬不得已豈肯輕棄故土亮荷曲宥該五營如由旱路繞來求咨行都李各處以免阻難許道身兩臺不可無一篆趙署道因該關每年須虧累七八萬久必陷坑來滬力辭許道則以釐稅併辦或可挹彼注茲此缺竟無可整頓祇有俯順下情且藉此假客軍糧臺以虛體面昨會鈞銜附陳

矣事丈前疏奉 諭旨一一照准卽另咨呈靈椒已否還湘

復曾沅帥

十七日奉初五日賜示敬審一一季丈加請 卹典仰荷 恩允足慰幽魂而勸忠節已通行知照聞忠護各酋仍分黨竄皖北號稱人數雖不足信亦可見該逆氣力之長希公計將出山皖北須待其來可盼肅清幼弟來信以師門念我兵單令韋志俊接守無爲樹宇等五營可速赴滬感荷曷旣常昭降衆有周興隆督守被圍四十餘日城外營卡盡踣地雷將轟仍苦守待救可謂真心鴻章所派鼎銘各營三千餘人已抵福山紮定營壘與援賊相持背水之陣日夜焦系如張樹聲等卽來相助或能解救周興隆係常德人薛公舊部中磨拭而得者益嘆楚產多將才也常勝軍尙未如額裁去英酋又欲換人接管多方脅持敵處如再添一萬人將炸礮等件學會卽與英酋議撤此時固未可驟行更張故餉項亦未能騰出沈

從九桂守提多日不得已與司道諸公設法拚集二萬金以應諄屬嚴錫康於滬上茶捐條理最熟前因茶商不至請赴溇勸辦業經定議歲可得七萬餘金幼丹咨商師相諭阻敝處不敢越境取利貴軍界蘇與江之交請卽轉懇提用作爲上海解尊處之餉不無小補如江右不准卽以左公在江蘇勸浙捐之例繩之且茶商願照向章與江皖無涉沈帥何必攔禁耶姪軍事餉事吏事已甚棘手奉 命兼攝通商節篆其何能支

正月二十六日復李輔堂方伯

奉嘉平十二日手翰並鈔示各節欽伏無既兩帥皆肯任事難乎其爲下矣兄離皖已久不能深悉原委但見前次公牘語過懸激恐將決裂敢不一進忠告茲兩處痕迹旣消左右同心宏濟艱危江皖生民之幸筱兄奉調粵糧復墮苦海遠嘆舊雨竊恐遷地弗能爲良耳穆如久叢怨謗竟入彈章然其質地尙好能否保全殊爲系念次青前案已否昭雪願無爲出

塞之行展雲學使無端 內召地山何時履新胡研生想已回籍左帥收復龍關湯三邑確否祈示一一皖南迭捷鮑張諸君有回春之機惟忠曾又率二三萬衆圖竄皖北希公不出鄂豫可憂常昭被圍四十餘日昨派水陸各軍由福山援剿翼可節節打入惟崑太難遽得手氣脈中阻軍事孤危匪伊朝夕又拜兼攝通商之 命才疏智淺終當疏辭以免隕越

二月四日上曾相

二十六初二日兩奉正月十六二十七鈞示敬承一一福山各營二十二十一二十四日連獲小勝賊援甚衆石營未能攻奪昨始添調李恒嵩帶常勝軍千餘人馳往協助未知果得手否常熟月杪來信賊以洋礮轟城多開地道攻撲日急如能再守旬日或可有教程鎮與鶴弟進紮崑太之間離兩城僅十餘里營盤甚堅糧藥儲足程鎮謂可無虞其得地勢耶常勝軍換派英兵官戈登會帶松郡可保上海數十里內空虛之至急盼上

游新募各營陸續到防稍資布置遠承厯系欽棟曷任惟四圍百里以外分設營壘其近水處則以薛部弱軍當之而專恃水師陸路要害則以敝部扼之小股尙不足慮若大股十萬上下分投並至誠有潰決之患矣英國陸路提督士迪佛立頃自香港回仍申前請仰慕威名赴皖謁晤據云商量軍務大局乞爲先容望假以詞色俾得盡言提督應用平行禮其隨從官員引之下坐士酋一月後即交替回國不知何所獻替洋商有濟金陵米糧軍火者能否與之力申禁約

二月十日上曾相

初四日因英提督士迪佛立赴皖索書手泐數行交其帶呈不識到否常勝軍千餘抵福山初五日合攻賊石營炸礮轟塌城牆數丈傷賊燬屋無數而圍常熟之大股漫山遍野而來各軍雖力與相持未能攻破該軍炸彈用盡仍欲回松賊中傳旨忠逆既至金陵旋以浙東全失常福喫緊又

帶人回蘇卽赴常熟周興隆等死守孤城外營被陷城垣轟坍而仍竭力
堵住降衆如此苦心忍耐亦難得矣仲良等仍索添兵敵處無可調撥接
帶常勝軍戈登毅然以增兵援福山自任卽日馳往督陣其忠義之氣似
較奧倫差強劉蔭渠制軍昨日由粵搭輪船抵滬帶親丁八人先奉 寄
諭有緊要事件航海赴京不知係辦軍務業將親兵遣散回籍登舟始奉
 諭旨調畿督不得已隻身逕往乃向鴻章商借兵將正值松滬空虛媿
無以應此等重大事體 朝廷不預知會徵調親信將士抑何隔膜京友
來信責望甚殷何以副之可爲憂慮浙東逋寇分歸皖蘇境內吳中若無
內江之患皖北必有深入之時吾師與鴻章所宜戒備不虞也樹五營未
卜何時來滬仲良已令威林密輪船由福山往無爲迎接一營計該軍當
先期登陸仍祈轉諭該船早回福山庶於軍情進退機宜可無貽誤至感
至感滬上釐金抽分抽錢較他省皆加數倍甫議增捐商民嗟怨惟尊處

餉需過絀與筠仙等再三斟酌仍由鴻章諭加若干俟果有成數按月儘解鴻章獨任其怨不敢分謗於吾師然亦可行則行當止則止耳

二月望日復吳仲仙漕帥

前奉初五二十四日手示軍書倥傯致稽裁答爲歎常昭降衆竟能困守兩月之久鄙意先慮人心不定赴援不及嗣屢得周興隆等帛書情詞懇篤因太倉堅城旣難速拔遂調浦東潘道劉副將各軍與黃軍門水師由福山進援詎聽逆陳炳文大股壘集海岸我軍屢戰屢捷僅能紮定營壘力與相持衆寡不敵難遽深入昨又添調留防無爲州各營並常勝軍二千餘人配齊外洋開花大礮用輪船駛往協剿冀可收一戰之功解重圍之險未知周駱諸將尙能苦守旬日以待之否浙東金華紹興繼克水陸官軍直下錢江聞杭賊糧匱驚慌惟待逆一股分竄宣歙忠逆亦撥隊由九洲洲上窺廬和希庵中丞二月八日始由湘起程如能於三月中旬趕

到督師堵剿則北岸大局尙不至決裂耳揆帥以沅翁病臂赴金陵勞師月餘卽返皖垣李世忠擁兵數萬乃獨與苗黨鬪爭而不肯力扼二浦旁竄之賊是何居心然賊必不犯彼境而入蔣壩三河閣下似勿過慮徒分兵力南北臺釐卡散漫無紀尊處委陳黃二君前往整飭或漸就理弟無須添派多員許道良善有餘英斷不足裁汰冗員冗費最爲目前切務弟屢爲函牘並與面要再得大才就近董率冀當補助於百一也趙署道因鎖關罰賠甚鉅苦求交卸又索替人不得祇能以此空名假容軍糧臺體面不謂與劾疏先後踵至外人或又謂各有意見耶湯海秋先生令嗣壽銘謹慎廉介喬鶴翁極贊之欲爲承乏一席希督核陳丞藉查釐以資歷練其識力如勝地方責任或更留意潤生同年之子今年將來敝寓入贅早屬該丞接引入滬一晤叨在心交故附及之劉松巖屢請轉致執事丹徒太苦凡委署一年後酌委江北中缺調濟卓見如以爲然並乞置之記

事殊中王道大經計已過浦蔣令如實有劣蹟似應撤任查辦知大君子必無成心也

二月十六日上曾相

初十日由輪船順遞一緘嗣聞大猷已赴金陵勞師皖中官民深盼遄歸不知何時返旆至爲企念英提督士迪佛立往皖不值更至雨花臺軍中否想爲赫德所購兵船入江預謀會師耳忠逆回蘇一行聞又赴金陵果已率黨上竄否福山援師與賊對壘戈登帶常勝軍續往借用英國礮火冀收一戰之效該軍驍悍近在松江有刦毀官署之案戈登接手似較講理其應敵亦較奮迅如能由我操縱卽月糜四五萬金猶爲有辭蔭渠制軍諄求借兵以陳飛熊張九元唐有章三將畀之尤爲分三百人雇輪船運送天津軍裝行糧約需一萬餘兩蔭渠忠厚平實此行縱無速效但冀其立腳穩住可爲京畿屏障亦爲北邊開風氣矣希帥出山有期能否直

赴營次不再於皖垣滯滯必可力保皖鄂全局李世忠與苗沛霖爭鬪苗終當噬之特恐李又倚忠逆爲援也浙東敗賊入蘇嘉者聞尙不多想趨宣歙以圖江右蔣軍已抵錢江左公或能兼顧徽婺金紹路通甯波口岸必大起色浙餉少旺皖餉即可專恃江粵之釐

復曾沅帥

連奉正月十八二十五等日手書敬審左臂積受風濕服藥少愈近更霍然否至爲系念軍情正緊忽作退思 聖明固未必俯允師門及鴻章似皆不可上陳尊府赫然爲海內人望所宗吾丈勛名位業獨出冠時又當金陵最要之地垂成之機進退去留關係極大稍不審慎則議其後者必多務新苦志忍守以待氣運之轉卽有不如意處付之適然大丈夫以身許國艱難困憊曲折經營亦不必 天意之見憐人言之共諒耳聞熟讀挺經更不厭百回讀也師駕已赴貴營何時回皖忠逆分股由九洲北

竄其意尙未敢直犯廬州希帥三月間抵皖師門宜催其速往廬巢之交
相機堵擊成軍門大吉一軍聞可調皖合之蔣蕭毛諸軍尊處又欲調派
劉南雲武明良各營兵力似足制賊但須希公督戰進止自操勝算浙東
肅清蔣方伯所部與甯紹水師直下錢唐江杭賊本單弱且乏糧或可以
兵威蹙之使去惟逋賊甚衆恐於江右皖北覓一去路蘇嘉暨歸陳炳文
分守現仍併力圖常昭如常再陷或竟解圍亦防其牽率敗賊窺我松滬
三月間敵部新營陸續到齊思有以備之此時罅漏竟無從彌縫也滬捐
入春大減昨議加捐糖油豆餅及房市各項適值勸辦京米頗滋商怨然
爲本地添兵保衛立言冀其怨而不怒或多得若干卽當爲我公略濟窮
乏但京外皆來告幫百喙難辭芟法動增需索無日能休雖智勇有必困
之時況駭愚不肖如鴻章者望薛覲翁 內召清閒奚翅登倦耶沈從九
桂頃始領銀二萬登舟三四月後捐數稍旺用項稍省斷不肯視金陵爲

隔膜如力實不逮定蒙鑒原焦山釐局洋人及南北臺皆以爲不便趙吟樵復議裁撤如可復設必爲都馮吳三公所侵占鴻章實避其鋒來滬一年未敢於長江及裏下河求生財之術蓋爲此也公或請師門主持何如二月二十七日上曾相

十六日由金陵餉員轉寄一緘計已達到十八日戈登帶常勝軍礮隊與張遇春礮勇圍攻福山壘賊潘劉張各軍併剿援賊遂先將石壘二座攻破並同時擊退大股援賊數萬是夜圍常熟之賊棄營潛遁次早追逐無及昌歧仲良諸將皆入城撫慰降衆仰託福庇出奇入險倖獲此勝思之猶有餘悸聽逆全回嘉杭浦東防務又緊已調潘道一軍回金山衛而令張樹聲劉銘傳與昌歧水師協守福山要口以通常熟之氣太倉守賊乞降未甚定議或再以兵威燴之太湖水師成軍當由何路下手常熟內湖進蘇柳潑進太湖來時再議所向

三月四日致王少鶴少卿

屢於筠僊觀察仲良太史獲誦惠書指陳切要頓開茅塞東南賊勢自左帥肅清浙東漸有起色惟大股未甚解散又蔓延於皖南北將於鄂覓去路耳而蘇杭金陵三大巢犄角往來根本尚難遽拔弟以孤軍支海隅一面須俟左鮑兩軍漸偪漸近聲氣相通乃可放膽夾擊惟左軍尚易接氣曾鮑諸部中隔賊巢數百里一時竟不能聯合也揚鎮皆畫地自守不足與謀進取揚營尤爲情虛俯仰四顧徒爲焦急彼族稍就羈勒然後患殆不可測

復羅椒生尙書

家兄籌辦粵釐甫經就緒卽欲引退此次調補糧道及大府疏留意殊悚懼吾師久在珂鄉必知粵中吏治民風挽回不易家兄素性拘謹正恐選地弗良莘農前輩式巖方伯吏才雖優官氣亦復太重彤丈未必能力持

之耳馮敬翁博通經濟足備諮訪惟其精力漸頹似無出山之志長江通商以來中國利權操之外夷弊端百出無可禁阻英法於江浙各口力助防剿目前小有裨益但望速平此賊講求戎政痛改數百年營伍陋習我能自強則彼族尙不至妄生覬覦否則後患不可思議也鴻章才力闕弱憂患久經遽膺重任軍事吏事洋務餉務竭蹶不遑終虞顛覆貽知已羞三月九日復劉蔭渠制軍

滬中遯遁輪裝滋慙頃奉惠書敬審風颺順吉星履迎祥下天上之將軍醫草間之羣盜先聲所樹指日肅清企頌無量陳副將飛熊等選募三四百人束裝甫齊弟飭海道籌撥萬金交筠僊代爲部署口糧船價及添購洋槍軍火聞尙餘千兩筠兄委慶令之金隨隊照料兼司支應計日可抵津門已嚴飭陳副將到津後卽速拔隊馳赴行營以供驅策現在畿南賊勢若何兵數若干有無可靠之將殊深系念便中望詳示一一此間於十

八日攻克福山賊壘擊退大股立解常昭圍困頃派各軍分圖崑太未卜
果否得手

三月十日上曾相

二十七日肅上一緘後三十日奉十七日鈞示敬承一一常昭解圍蘇逆
與浙紹敗賊復剝衆來撲黃昌歧率同水陸各隊禦之賊蹤離城數里離
福山十餘里太倉守賊屢乞投誠鶴弟派營員入城商辦約於初九日已
刻內應我軍如期出隊未甚戒備東南門忽出大股衝動官軍因以小挫
程鎮在西門則獲小勝逆情詭詐可惡崑太援賊甚多戈登已帶常勝軍
前往協剿鴻章擬俟雨霽馳赴前敵察酌調度接總理衙門來函商令白
齊文復帶常勝軍雖英美公使代爲力保中國豈毫無法度白齊文自京
回滬充然得意求鴻章卽委管帶已嚴拒之並詳復恭邸矣 朝廷紀綱
須共存立乃如此模稜畏事是非何由得明令人灰心戈登則英兵官之

賢者可與甯波之唾樂德克抗行卽不能盡去常勝銅習似不至再添流弊松滬官民頗交頌之皖南聞甚穩固分竄皖北一股闖入廬境惟冀希帥早至遏此巨患鴻章欲與程學啓戈登併力崑太以通常福之氣非敢遠畧實處萬不得已之時然賊衆我寡豈可遽得且惴惴焉恐有顛覆仰荷諄勛益深敬佩現爲滬上洋務餉務所羈一搖足卽有變動而前營相去日遠將多驕縱誠可憂危程鎮矜夸忌嫉不能容物是其病根至其戰守方畧能當大敵郭松林則勇而寡謀鶴弟初太寵任屢函戒飭茲始稍信而堵剿萬緊又不能臨警易將且滬才甚窘亦猝無可易之人鈞諭所云置妾虧餉此間早有所聞大都自程鎮造出屢查無據行營似無藏嬌之所若在上海該鎮數月不一至此人言或未盡信歟容再密訪有替手有實蹟鴻章斷不稍姑息庶罰一人而衆人服且懼也劉松巖求卸一篆其才實未足久兼繁劇欲調晉鶴署薇而鈞愜慎選代者久未獲報無已

卽請筠公兼臬尊意如不刺謬敬乞明示渠早已自營回公館矣
復左季高中丞

月初奉二月十一日手諭敬承威烈丕振有疾風掃籙之勢老亮指揮籌
略當時殆無伯仲矣浙蘇唇齒聽下風而席餘威幸勿以鄰爲壑傾佩之
餘尤所企禱蕪泉方伯進駐義橋杭賊闐然欲走其時聽逆陳炳文正在
圍撲常昭我水陸各軍由福山海口進擊該逆遂舍而救杭近聞武林蟻
聚如雄師直下則浦東西亦衆賊之所歸昨緘商蕪公杭城復後能否由
海甯海鹽乍浦卷旆而西既可杜沿海洋艘之接濟軍火又可與敵部之
在金山張堰者聯合一氣共圖嘉禾而達於蘇不識有當於方略否廉訪
回師欽發於江皖全局然有關係大蠱居殿左右控扼並能進吞湖州斯
爲得勢甬東洋兵利害參半法人嗜利更甚於英史丈難於酬謝仍賴雄
鷹就近勾當總理衙門又與哥公使遣一法弁赴甯代勒伯勒東之任諄

屬鴻章加劄此所謂畫蛇添足又法會以溫州劫案在京饒舌屬鴻章轉致執事查催均乞核辦浙饑之絀浙民之苦似較近年之皖南北尤甚戲下經營曲折以赴成功豈非磨煉英雄之具滬上月入三十萬半以資給島人相沿成例鴻章閭弱不足以挽回之祇滋慙懼敵軍水陸近三萬苦乏統將月餉亦僅及半再畧濟安慶金陵鎮江各處力亦窮矣浦東新復鹽場久廢此間但抽岱鹽之釐以濟餉月不過二千金所得甚微筠公現爲尊處設法鴻章有助無阻但恐無法可籌耳楊坊坐擁厚貲不行善事非仁聲仁言所可感動弟則終歲不謀一面自斥革後更靦然以洋行市偷自居俞斌罰繳二十萬尙未措完又已查抄可在不論不議之列徐守寶治實無赴浙川資全眷避難本難安置其人極醇正踏實可否委一滬差將來權守嘉興必不辱命筠公想具言之常熟解圍與敵軍中隔崑太極思合力圖攻偽幕朝來會四王之衆遽集於此地勢頗難展布終恐顛

蹶所冀與貴軍漸漸通氣無孤立無助之患

復彭雪琴侍郎

屬購真洋礮適有洋行新到之貨似尙堅緻合用代辦一百尊交徐委員
文達附輪舟過裕溪解呈望立刻派船接收無誤行程至該價若干勿庸
寄還鄧長里張學泗二營如能設法配齊礮勇早日下駛以慰遠盼深感
厚誼儻九洲不能闔過或在上游滯滯久必饑乏並望時時接濟爲幸
昌歧協剿福山兩月有餘遇颶風四次船被損壞人被漂沒而忠勤照料
百折不回卒解常昭七十餘日之圍困但地廣路歧戰船殊太單薄爲之
焦心

三月十七日上會相

初十日寄上一緘計已達到十一日奉三月初一日手諭並密奏片稿伏
讀再四欽悚曷任程鎮與戈登商定進攻太倉十二日先拔三營進紮西

門正與賊石壘二座相對十四日黎明賊水陸來撲程鎮設計擊退奪獲礮船三十餘隻賊目盡殲之戈登亦帶大礮攻賊營霎時卽破程鎮派隊駐守之十五日戈登在營前排列開花巨礮十餘尊對城轟打賊始避匿堞下繼則深藏子城地窖中礮力所穿無孔不入自午至申轟倒二十餘丈城內屋瓦皆飛擊死悍賊無數先出南門猛撲經三舍弟所派隊伍擊回我軍奮勇大呼登城上下數回合猶巷戰片時諸軍合力圍殺之蔡逆首突圍由北門潰走又經程鎮追擒斃割之城賊實萬餘人漏網蓋少慘劫亦快事也蔡逆新封會王係僞忠王之壻在賊中著名兇狡忠賊北行以蘇浙一帶地方交蔡與慕聽兩王防守殲此渠魁亦去一患在城中搜獲僞文內有忠逆來信鈔呈似該逆蓄意北犯未必遽回蘇巢祈吾師與希帥嚴密防備爲幸浙東敗賊聞止踞紹興之僞來王一股併入蘇州聽逆添守杭城似難卽克戈登同程鎮欲乘勝進攻崑山崑太相距三十二

里有不可中止之勢地廣兵單布守不易西洋炸礮重者有數萬數千舫
輕者數百數十舫戰守攻具天下無敵鴻章現雇洋人數名分給各營教
習又募外國匠人由香港購辦造礮器具丁雨生卽來監工又託法英提
督各代購大礮數尊自本國寄來大約今年底可漸集事每思外國兵丁
口糧貴而人數少至多以一萬人爲率卽當大敵中國用兵多至數倍而
經年積歲不收功效實由於槍礮濫若火器能與西洋相埒乎中國有
餘敵外國亦無不足俄羅斯日本從前不知礮法國日以弱自其國之君
臣卑禮下人求得英法祕巧槍礮輪船漸能製用途與英法相爲雄長中
土若於此加意百年之後長可自立仍祈師門一倡率之士迪佛立自燕
湖回談次頗談上游軍中無利器是以有請練萬餘人之說戈登智勇兼
優尤喜英國濟助軍火源源不窮價值尙不甚貴打福山須千餘金打崑
太須萬數千金也淮勇向多騷擾鴻章時以禁誡諸將斷不敢稍存袒護

惟勇易集而將難求徒深惴惴都公軍氣不振部下惟詹鎮啓綸素稱能戰近益沾染李世忠風派專於販賣霸占都帥莫敢諫禁論者謂富都護差強究未悉其底蘊衰下河暫可無事如希帥擊回忠黨則旁竄淮揚意中事也臆底奉獻微物久無輪船帶往乘便補呈伏冀鑒納

三月二十九日致薛觀察

浦江送別悵望停雲遙維風颺穩渡劍佩趨朝 恩眷優隆企頌曷已此間各軍於十五日攻克太倉殺賊甚多遂乘勝進圖崑山偃城紮營該逆仍抵拒不退弟於二十後親赴太崑察看布置我軍立足似可穩固仍飛催常勝軍備齊軍火前往會剿如能迅克崑城戰守較有把握李泰國自英來滬面稱代辦兵船七隻已陸續購齊兩月後可到中國惟前匯八十八萬尚不敷用屬弟由海關提銀十二萬找付船廠及弁兵川費立須兌交不容延欠弟以海關入款甚絀按月指撥各軍餉項實無力再籌鉅款渠

意甚快快將赴總理衙門請撥詢其雇募弁兵口糧章程及軍火修理雜費月需若干皆無準數與赫德前在總理衙門所議各款迥不相符赫德昨由鎮江回滬聞李泰國頗有齟齬而在滬英官衆論僉以李泰國爲人本不方正不如赫德實心和氣此項兵船若令李泰國一人專主要求脅制後患方長卽戈登亦不願與之共事弟僅見一次該酋多方薰嚇氣焰陵人弟雖不爲稍動誠恐伊至王公大人之前故態復萌立法定章之始似須堅明約束杜漸防微免其在外饒舌該酋素服閣下德望將來一切定議想必仰賴大才擘畫該酋欲壟斷取利力排赫德前議而總理衙門創議購買輪船乃係由赫德轉託李酋者今何能盡廢赫德前訂章程而爲李泰國所把持耶李酋邀令新闢書記廩生孫文川隨同入京孫生深明大義有可暗爲轉圜之處祈加意焉

四月四日上曾相

三奉手諭敬承一一鴻章因太倉新復三弟入城布守程鎮十五營進紮崑山東門常勝軍忽因疲乏撤回繫念前敵軍情於二十一日馳往各營察看布置並周歷崑太青嘉各城形勢月杪甫回上海是以遲久未報石湖埠圍困已解鮑軍從下跟追忠逆素憚鮑名必可擊走如能乘勝壓回二浦留蕭毛各軍沿江置守皖局可永定矣南岸窺鄱建一股有江軍扼住景樂左軍游擊徽發當不致深入腹地惟尊處饑需奇絀義當籌助頃與司道諸公竭力拊搗僅得六萬內尚有挪借京米捐銀二萬盍願目前近來議加豆餅房市各捐月可增二三萬如可源源征收應隨時分濟若干滬中富商以嘉湖絲棧閩廣洋藥糖棧甯波雜貨木行爲大宗徽商向止茶販現無來者江西亦無富賈流寓在此蘇常則有紳無商若派員專勸蘇皖江西商捐斷難集有成數浙商則左帥已一網打盡且段廉訪所解七萬之後亦無續捐鴻章蒞滬以來但於釐捐加意整頓謂不斂一人

之怨可供常年之需從未輕議商富大捐蓋有鑒於前此薛吳二公勸捐二三十萬至今尚未繳清於事何裨况今日浙捐米捐接踵而至民力不給人言尤可畏也甯波稅釐聞月得十五萬元近來河口茶商通行當漸興旺紹興想已說卡未知收數何如左公三月分在甯局提用洋元二十萬中有歲底存備迎犒之項然左軍自此入款必漸多耳沅文新授浙撫自未便與季帥爭餉日久或宜將景鎮河口兩卡酌還其一李泰國自英來滬滬索十二萬兩昨已函致總理衙門速籌定章另稿呈鑒此項兵船五月內到滬專指爲協剿金陵九洲洲之用而金陵克復便成廢物其纏繞需索將無已時有大害而未必小利恭邸能發而不能收疆帥更毫無把握頃得總理衙門來書欲鴻章與李赫兩酋在滬定議該酋等但知恭邸恒祺輩柔輒易入必欲赴京且俟如何定奪論白齊文一函係凌筱南屬草鴻章增訂迺蒙獎藉慙悚曷任白齊文又赴京要求總理衙門未知

若何處置能得數萬金遣回本國卽是好結局仍怨做不到也洋務最難著手終無辦法惟望速平賊氛講求洋器中國但有開花大礮輪船兩樣西人卽可斂手日本小國現與英人構衅提督糾伯臨之以兵日本君臣欲與開仗刺曾遂一再緩期此明證也篋軒擢蘇藩喬丈擢甯藩可謂得人前議派員署臬卽作罷論可否卽飭篋軒到任敬求核示程鎮帶水陸各營進紮崑山東門屢獲小勝忠逆赴皖慕王譚紹光守蘇聽王陳炳文守嘉雖有十數萬之衆然屢挫於敵軍勢已窮蹙戈登仍卽帶英國大礮往崑會攻諒可得手崑新果克則與常熟蘇州嘉興各河湖打成一片戰守似易爲力惟地段太廣師船太單李朝斌一軍果卽東下進取可圖祈敦促之爲幸護逆陳坤書欲由江陰北竄靖江一無防備可慮之至忠逆若回蘇將來亦必由此潰決大疏屢以裏下河爲憂政恐不免此阨鴻章專力松滬崑常已爲不自揣量焉能遠及吳長慶三營承允發還俟廬江

困解求札調省城暫駐卽派輪船陸續載來劉仲良智勇堅苦爲皖才之最可作好統領擬以吳長慶王占魁三營畀之再湊合五營可與潘琴軒觀察共當浦東嘉興一路六弟昭慶堅定勝於三弟惟戰事素少閱歷鴻章固不便再令留營容以鈞惜稟商家慈暨大兄處

復曾沅帥

頃聞新奉 恩綸晉持節戍儒將盛名德門佳話驩抃無量惟有位無地有權無財仍係美中不足須盼金陵大功早成以兩粵四川酬庸藉享安閒否則當與鴻章把臂入林泉耳石湖鋪已解圍貴軍分其鱗爪鯁彼喉牙加以鮑軍並攝其後忠酋當卽率黨回蘇邇來戰狀何如殊爲盼念洋船接濟城賊總理衙門議令敝處雇撥輪船二隻上下巡拿因籌款維艱與李泰國赫德議俟五六月所雇英國兵船入江協剿卽分派巡查惟英人銳意剿洗九洲洲金陵老巢以擅大利市大名此項輪船先有一番要

挾再有一番惡戰後患方多願吾丈乘其未到攻奪此隘亦免得無數口舌矣此間於三月望日克復太倉實借戈登大礮之力程方忠督所部偪紫崑山城下該逆死拒不出中隔大河無法攻打仍須參用開花礮或可得手崑新果復兵力雖不足圖蘇形勢乃得以自固郭松林四江口之戰頗爲出力三舍弟自此益加倚任不免恃寵而驕鴻章屢規誠之買妾虧餉之說曾熟聞於程鎮密加查訪曾買一妾或謂業經送回虧餉則毫無證據程鎮似有宿嫌且多嫉忌難遽偏信容俟訪實再行酌辦該鎮近聞衆毀憤而咳血或亦漸知收斂其勇往則尙可用耳朱士達若來滬必不留用師門索濟八萬鴻章深知皖餉奇絀義應竭力籌濟頃始湊解六萬內有借用京米捐二萬其窘可知此項定可分濟我公也佳羊毫現無存者覓得再寄蓋此調不彈久矣

四月九日復吳仲仙漕帥

奉三月二十八日手書敬悉榮拜 恩綸真除使節皖省自二楊在江南北失事十年以來無繼起之疆臣鴻章倖附驥尾同建勳牙又得昔賢分地人謂省運之轉我兄弟惟互相誠勉惴惴然恐有隕越上負 聖朝下貽鄉里羞耳喬鶴翁先已請假欲避臺務但以江藩管餉成規具在公道無頗 廷旨既專責成吾輩斷難參議筇僊同年擢繼使不日當卽履任揆帥久思擇人整理鹽綱筇兄亦祇能專力鹽務庚申夏間揆帥薦弟兩淮一席當時約定祇管運鹽不兼糧臺今筇僊爲之帥意亦必不易斯語耳鶴翁接篆後饒事半指釐捐郭觀察禮圖果合手否如稍未洽似宜由鶴翁另委總辦弟局外臆度未知當否仍希詳酌苗沛霖之叛久在意中適值忠逆與捻逆合竄六安粘連一片又無專剿之師皖患固無紀極邸帥已至畿疆能否迅速回旆若乘張落刑伏誅之時一鼓掃平苗穴再圖北征最爲妥善茲亡羊補牢將養成炎炎之勢唐義渠饑軍孤注可危之

甚公須設法濟助藉固清淮門戶也鮑軍門率二萬人由桐城尾追忠捨合股如速驅出境就便搗壽正後路則亦釜底抽薪之策揆帥專志以鮑軍肅清皖北或當次第圖之鮑軍餉亦甚絀未必能速耳此間自三月望日克復太倉遂與常昭福山各營聯爲一氣程鎮所部進圍崑山劉鎮所部進規楊舍惟幕逆譚紹光率五僞王分路來援各路日有戰事屢獲勝仗崑城或可得手敵軍水陸接續召募現已四萬人分布浦東西數百里間猶覺左支右絀需餉過鉅益難供輸其中苦況不能殫述馬牧事曾否查明近來匿名揭帖層見迭出昨泰州郵封遞到無名氏一函附呈周張二令官聲弟未得知其謠歌及陰事者尤可駭詫亦足見人心之浮動矣並新留心訪察

四月十日上曾相

初四日肅奉一緘計已呈覽聞苗捻復叛據淮河上游州縣窺逼臨淮又

與楚北下竄忠黨上竄兩股句結一片想見蓋勞犖畫籌布維艱曷任懸
系鮑軍尾追已抵何處曾否接仗該軍虧餉太久逋亡甚多士氣不如從
前之奮良可憂也希公當已到皖前路諸軍得人調度必能漸收功效程
鎮進紮崑山東門相持半月暮逆剝大股由蘇來援分擾太倉鶴弟與程
鎮分路截剿連獲勝仗逆焰少衰頃戈登帶大礮前往會攻冀即得手護
逆竄常熟江陰交界亦經劉銘傳分隊堵擊當不致渡江亂竄惟兵單地
廣罅漏殊多若他處再添大股援蘇恐未盡穩固且奉 旨飭查大江水
師一案王道大經查覆似尙認真尊處軍完或無暇及鴻章已冒昧會列
鈞衝入奏另鈔呈正緣吳全美接統後江面漸覺肅靜郭定猷張瀚等現
仍分防未便追咎既往陳鎮國泰所部濟匪多年茲已遣撤回粵應予簿
懲泊鎮年老勒休似亦可塞衆望江防喫重之時無船可替既用其人不得
不量從末減且水師藉口餉缺營規實難深求幸祈鑒亮吳仲帥來信

以喬方伯不願接任畏避糧臺卽強之亦不能久屬請命吾師派有威望大員接管其意或激射筠仙鴻章已堅詞拒止都與富不合吳與都富不合喬與吳亦不甚合筠公赴離使又不免自成一家江北政出多門乖氣乘之終非嘉兆

四月十三日上曾相

初十日肅緘計已到皖頃奉初六日賜示以餽歲微儀重蒙齒及濩支似尙可用迺援胡文忠成案辭卻一半二十年老門生區區之敬豈敢與名賢投贈相比然師門敦勗之義則甚厚矣沅文擢任封圻仰見天心眷篤論其才識允可獨當一面卽圍剿金陵亦須有專征之權 朝廷似已稱量而出昨得來牘並書諄屬代辭與前奏謙孫之意春間開缺之稟實皆出於至誠尊處能仿雪琴故事代奏否請改武職名義似未甚協且優貢出身原非味根可比如 廷旨不准固辭祇可奉 詔此非鴻章所致

妄陳也僞募湘來等四王之衆分撲崑太各營初七八九日鶴弟一軍鏖戰獲勝退至崑山北門連夜紮營二十餘座程鎮奮力擊之適戈登至營以開花小礮協攻十一日破賊營二十四座擒斬淹斃將近萬人援賊勢衰而城賊猶死拒不退日來陰雨戈程兩軍會商轟打或可得手生擒賊供亦稱求救於忠逆約十四日至蘇來諭六州圍解忠黨由廬巢回窺其救蘇固無疑義忠若不速回援不但崑城難保蘇州亦將瓦解該逆等盼侯忠酋故皆死守以數其歸期耳尊意慮及回撲金陵大營與揚州似目前無暇及此如將來救崑常襲松浦不得逞則繞竄裏下河固意中事筠翁擬赴泰州後練勇一二千其志甚遠但恐籌餉不出鮑彭肅三軍合攻巢含蔣成毛三軍合討苗逆又得希帥調度行間實操勝算皖民再造之恩也前解洋槍六百枝此間已掃數報盡適丁兩生由粵解到二千枝卽交程廷傑速解以應臺命槍愈多則需銅帽愈多如皖營製造未成仍飭

由香港採購較爲便宜近因查拿嚴緊水路又不通暢洋商販槍帽來滬者漸稀是以價昂而難覓總理衙門覆函白齊文不准帶兵仍解交鴻章懲辦

致曾沅帥

連奉四次手書無微不至既承塵注之厚亦見箋筆之勤才大心敏超絕流輩鈍拙如鴻章者更汗流走且僵矣金陵一軍關係南北大局從前有專征之將軍提督尙致敗潰我公屹然砥柱實非監司氣魄 朝廷畀以開府名位謂可鈐制材官專疏言事尊議有克亂在權之說不其然歟迺盛懷謙抑必欲固辭無論封疆進退非臣下所敢議文武易置非書生所能矯而受 命開府仍以呈文付之下走從古至今無此例案鴻章不覺震悚失措與筠荷諸公熟商惟有原璧返趙之一法又深知我公退讓出於至誠稟商吾師援去春 奏案代爲疏辭不獲已仍當奉 詔不入耳

之言來相勸勉幸祈亮之喬鶴翁得江藩亦懇鴻章請改武職近日之提督軍門誠可羨也我公若得請恐援例而起者實繁有徒竊謂近世祇有江味根張曜無科目之資能改武官公則堂堂文人學士何亦變計出此本擬專解貴軍二萬因師門急索八萬彙解往皖能分得若干否忠曾圍六州未下師信已由廬巢回竄急援蘇州僞幕來湘等四王之衆傾巢出援崑太初七八九日舍弟一軍苦戰屢捷又退崑山北門紮營二十餘座經程鎮督師痛剿俘斬萬人盡燬其營崑城踞賊尙盼忠黨來救死拒不下文登已帶開花礮前往會攻或可得手蘇垣亦甚驚慌忠逆自應回顧老巢若乘其過江喘息未定尊處以奇兵邀截之否則俟其回蘇四出雕剿以牽其後俾敵軍不至過於喫重感德匪淺四五月間吾師不再徵餉當仍竭力爲公處設法也以後謙稱照例不用應請批准

復彭雪琴侍郎

奉三月十六日惠復百戰幾幾之敬迺蒙稱道勿衰足見大君子與人爲善之盛心昌歧軍門所部水師皆我公全力扶持俾鄙人得挾以自豪報本返始鴻章豈敢負心正泐復間又奉四月初三日賜示爲李質堂挑選營哨又慨允分撥右營全船交質堂帶與昌歧並令鄧將萬林帶快蟹船來助公之情深意厚不獨昌歧感戴鴻章尤奮激思報他日當再以洋槍酬謝也忠酋由六州回竄計已過江鮑彭蕭各陸營與雄師合攻巢縣銅城岡必奏肅清從此沿江置守可常安枕此間崑城踞賊仍盼忠酋來救死拒不下戈登帶開花大礮前往轟城或可得手所慮忠黨回蘇四出抄擾陸軍固單水師尤分布不及昌歧帶四營赴常熟東西湖猶恐首尾難應質堂如卽統師下駛九洲洲能否闖過敬祈商催速行無任企頌

四月十四日上會相

前函未發程鎮專弁飛報崑山新陽縣城於十四日卯時克復先是十一

日毀賊城外營盤二十四座城賊卽搖搖欲動而自崑回蘇祇有正義惟
亭一條旱路程鎮於十二日派隊圍攻正義石營十三日攻破卽派二營
自督水師守之僞來王遁回蘇城僞幕王尙在崑城十三夜初更城賊大
隊由正義猛冲經各軍憑險以槍礮對擊自初更至四更子如爆竹河岸
積屍數尺四更後哀呼乞降天明擒五千餘人僉供幕王躍馬赴陽澄湖
渡去一片巨浸必已淹斃未藉戈登礮力克此堅城殺賊逾萬實非意料
所及程鎮謀勇險辣冠絕諸將於此益信若無忠逆援蘇恐其餘黨無守
志矣合亟奉佈仰慰慈廬並乞轉寄沅丈

四月二十日上曾相

十三四日連布兩緘交程廷傑帶呈計已入覽崑新克復查得踞賊與援
賊擒殺淹斃實有二三萬人千汶百港漂屍浮油僞幕凍兩王實皆傷槍
投水而死郭松林僅帶四百人協剿正義擒獲送滬至三千名之多他營

稱是昔嘗憂松滬進兵不宜乃轉以河湖低窪可多殺賊上年九月四江口之戰斃賊近萬自此聽慕兩黨不敢與我尋戰今崑山之捷俘斬尤衆慕黨精銳已盡忠酋卽回羽翼不豐膽氣尤歎其將衰之機乎譚紹光圍取湖州其勢遂張聞太倉克復乃在蘇州槍斃趙竹生而自將救崑亦與俱陪陳炳文一股近六七萬向稱剽悍而貪嘉興財賦不肯出師自去年五月虹橋戰後屢敗於我然尙有得力之將茲分兵抵禦富陽蔣方伯一軍又恐我襲其後侯忠逆回蘇或當併力回撲如託威茆再能打一二十大勝仗蘇嘉當漸定耳鴻章惟嚴諭將士戒驕滿戒輕敵穩慎圖之鶴弟與黃軍門由常昭進規江陰無錫陸軍二十餘營程鎮由崑山進蘇州婁門已紮營小唯亭峴子山角直等處距蘇不過十里陸營七千人水師四營聞其扼紮皆得地勢戈登帶常勝軍暫駐崑山擬先取吳江平望以剋其枝葉惟師船太單不敷分守師門可否飭催李朝斌太湖水師迅速東來

以助進剿感盼無既自去歲至今奪獲賊礮船百餘隻蘇州太湖存船不多其勢斷不敵我水軍如卽有大幫師船駛進太湖則全局俱振矣蘇省減漕之議師意曾允力行馮敬亭前輩創稿已久頃在幕中日催趕辦前屬筠仙錄稿請示主政敬翁云其中委折甚多似須由此間妥籌會師門前銜具奏松巖荷汀以州縣浮收難於盡裁其要在減額而敬翁則欲並舉鴻章以爲先懇 聖恩裁汰浮額俟得請再行設局籌議如何刪汰浮收章程仿照胡文忠鄂漕辦法次第具奏敬祈核奪示遵此大政不宜過遲也希帥果否蒞皖探報忠黨已渡江而南尙無到蘇確信如撲我金陵大營此跟踉疲乏之衆沅丈當能禦之若回蘇休息布置從容出奇則皖北與金陵皆又鬆勁苗逆有直趨臨淮之謠唐中丞能否支柱殊爲懸系致曾沅帥

十三日肅復一緘並恭繳大文亮已達到十四日克復崑山新陽飛報師

門請卽轉致是役也程鎮與郭松林賸嗣武成俞卿張光泰帶水陸二千餘人扼剿正義賊巢立即守之城賊援賊三萬餘衆無回蘇旱路遂一鼓禽滅爲軍興以來罕有之事慕凜兩王伏誅郭松林僅四百小隊生擒悍賊三千人送滬並陣斬守崑之僞主將似可稍贖前愆伏冀原有忠黨聞已渡回金陵是否東來尊處諒有確報敬祈速示蘇城係慕逆餘黨惟怯之甚程鎮連日進紮小唯亭峴子山距蘇州婁門十里如忠曾回蘇當有惡戰蘇城太大三面賊區戈登欲先攻吳江平望以斷左臂三舍弟與黃軍門欲進圖江陰無錫以斷右臂箭在弦上不得不發鴻章惟切屬諸路將領穩紮穩打逐漸而進恐其乘勝深入有意外蹉跌也地日加廣兵日加增而餉不加進尤深憂慮李質堂太湖水師計已成軍此時卽可進湖此地尤宜水戰求我公代爲諄催感禱曷已昌歧所部二百餘船分剿二百餘里河湖支汊實覺左支右絀蔣蕪泉方伯仍與陳逆炳文相持於富

陽姪亟盼其速下杭州與敵軍犄角或分圖海甯海鹽與我浦東一軍會
取平湖乍浦席捲而東先克嘉興再取蘇州更省兵力皖南北各股若不
能竄江鄂計當合救蘇嘉以保財源吾文或覩此隙從後牽掣之尤感大
惠

致左季高制軍

頃奉四月十日復示敬諭榮擢兼圻從此事權歸一兵餽統籌當可以閭
稅之有餘補瀾軍之不足慶幸曷已各股悍賊銳圖竄江賴麾下先幾果
決緩杭急皖以劉廉訪所部突出婺州擱頭痛擊三省大局乃臻穩固敬
佩服聽逆陳炳文在忠部下最稱悍衆洋槍極多自去年以來敵軍與
之搏戰迭敗於虹橋四江口福山常熟等處其精銳已漸喪失茲前爲蔣
軍所遏後爲浦東潘觀察各軍所牽進退狼狽終可撲滅聞蘇巢各酋向
恃陳逆嘉興分地釐稅爲接濟一郡所入歲輒數百萬然則因敵爲糧須

急圖禾郡以餉蔣軍乞公留意太倉於三月望日攻克禽馘數千淹斃又數千崑新於四月十四日攻克程鎮學啓先督軍扼斷正義唯亭去路遂將僞慕凜王兩犬股屠戮殆盡漂屍約三萬餘稍快人意程鎮進紮蘇之婁門城賊慌甚其輜重婦女分移太湖洞庭山及金陵而忠酋自六安解圍回救聞已徘徊於常州無錫一路劉鎮銘傳與黃昌歧分軍由福山攻克楊舍汎城斬獲二千三舍弟督所部由常昭進指欲伺江陰無錫之隙以斷西來援賊地廣兵單尙慮不敷分布惟盼李朝斌太湖水師速來則可剗賊之腹地而左右牽掣之更冀蕪泉方伯速下富杭與敝軍漸漸通氣仰仗威庇或可相與有成耳李太國所購英國兵輪船六隻五六月抵滬現赴總理衙門議口糧章程秋初將駛金陵助剿賊勢實衰十年老巢乃必藉外人以收功後患將不可知此事定議於兩年以前今昔時勢小異恭邸則欲罷不能須累我江洋各關常久賠累矣甯紹兩郡從前專恃

洋兵今尙不能脫然卽滬上常勝軍情形正復相等鄙人受命敗軍之際又力薄不敢洵洗幸英兵頭戈登接管尙循禮法月糜餉五萬東征西剿亦尙効命須蘇常肅清方可分別安置裁撤史觀察爲難之處亮蒙鑒照筠仙擢淮運使似須赴任段鏡湖尙未到滬筠公爲尊處經辦各事徐守能否接替平望吳江有投誠之說六月後擬乘機圖嘉善平乍各處地方官當遵前諭權爲署置

四月二十八日上曾相

連奉十六二十三兩諭謹聆一一劉鎮銘傳會合黃軍門水師於二十一日克復蘇常交界之楊舍汛城將守賊二千餘圍殺殆盡劉營有開花礮三尊兩法兵教習遂見功效而爬城弁勇傷亡至二百餘人三弟已調樹松各營前往會攻江陰或可得手蘇城輜重眷屬聞多撤往金陵太湖賊計總俟我軍攻打抵禦不住乃走耳城大兵單斷難合圍鄙意欲先剪

其枝葉再圖拔其本根庶多殺數賊置守較易蘇嘉腹地稅釐頗旺又係水鄉賊衆豈肯輕棄不比他處克一城則各城思潰也鴻章所得浦東西十餘州縣之地添兵至四五萬而餉不加增去冬松屬田捐僅二十餘萬串釐卡添設數處月不過二萬串以是知籌餉之難惟盼李質堂太湖水師速到速清嘉屬各鄉鎮扼住水口直搗湖心則兵事餉事及兩省全局脈動筋搖蒙飭趕籌二萬以資一月行糧勉強湊濟借用捕盜局天平輪船飛解至皖卽求轉交如已由師處墊給此項卽作協款更有懇者滬局無處購硝數月來征戰不休專賴洋藥濟用價高貨稀毫無儲積且不能應手竊所焦慮水師需藥尤夥求師門酌撥五六萬觔火藥交質堂順帶下駛感頌曷已李秀成尙無回蘇確信六安解圍與苗逆夾淮東走大隊夜行天長已報失守勢必窺伺揚州都富二公久踞形勝當能扼堵裏下河門戶至南岸果能攻克江陰似不至北竄矣蘇省減賦一案仰承指示

深切平實司道同聲欽佩俟蘇垣告捷騰章乞 恩定可 俞准屆時如
北路有阻卽由輪船飛遞也

復曾沅帥

師門寄到謝 恩疏稿陳義甚高有古大臣退讓精白之意求改武職鄙
見亦深不謂然幹事不在韻書多少卽公之學業已足媲美時流所論方
今要務全在籌餉養兵添兵打賊此外皆在所緩數語便是疆吏大本領
惟有土此有財以虛銜而受無餉實禍竊爲公憂之左帥擁幣紹金蘭富
庶之區又得兼圻可調用閩省稅捐尙向人訴苦蒙所未解昨福州美稅
務司來謁云閩省三洋關歲增收二百餘萬已冠絕江洋各關人皆說上
海關爲天下第一薛吳二公在任歲收實三百萬自漢九開征免單又改
存票月不過十萬近僅六七萬耳彭劉各軍分紮望城岡放王岡巢城賊
必宵遁可無待鮑軍之至惟六安回竄一股與苗逆夾淮東趨已陷天長

圖撲揚營都公或可堵住劉銘傳與昌歧攻克楊舍汛城欲搗江陰兵數稍單分布太遠每爲惴惴李質堂太湖水師聞可東下師諭籌濟行糧二萬此軍關係蘇浙全局竭力湊撥而貴軍餉項又無可籌應僅拊輪舟解上養廉七千餘金殊以爲愧三舍弟已赴常昭西路創痕久愈承念及之復吳仲仙漕帥

昨得四月十八日手復敬諭籌防穩固天六游氛聞已逼近維揚都富二公當可力扼其內竄之路尊處蔣壩三河防軍最得形勢諒亦不能闖入清淮惟靈泗一路有無堵禦忠苗兩黨垂涎裏下河已非一日此次窮無復之必作乘間搗瑕之計望加意戒備是幸僧邸能否罷濬川之攻卽指淮南非此軍不得收功也李良臣併力剿苗亦是一助唐義翁當可立腳崑新於四月十四日克復蘇賊甚慌而財賦之區一片水鄉彼可恃險抗拒尙非旦夕可下現令三舍弟同黃軍門進江陰無錫程鎮進蘇州吳江

戈登所部繼之徐圖攻取仍盼李鎮朝斌太湖水師速來庶可漸入蘇嘉
腹地與爲牽綴耳馬周各牧今既查無實在劣跡應作罷論史幕韓覆稟
附繳祈隨時督辦弟毫無成見也高郵境內兩次劫奪采買軍米委員銀
兩陳洪鐘本係合肥廩生品行端謹弟所素信無端被劣弁毆辱令人短
氣務望嚴飭查追如再延閣弟祇得奏參示懲矣喬方伯接辦精臺必能
措理裕如郭觀察既所推薦必能相與有成弟前以許緣仲與郭公似有
意見故兼及之淮安府徐州道兩缺應如尊指卽以顧朱二君請補顧必
干部駁能奉 特旨俞允方好或請尊處挈銜主稿或咨由敝處會奏惟
命是從敬希核奪

復黃昌歧軍門

松建親兵樹盛各營濠壘已就能否出隊一擊顧山之賊劉省三欲攻江
陰已由滬起行至常後想可與老兄及三舍弟籌商穩慎之策也鄧張兩

營初十日抵滬俟養息料理數日當飭赴常熟西湖聽候調度蕩口既多逆賊槍船俟各營調齊能否進剿惟該處距蘇州無錫較近係內河必由之路如攻克似須派兩營水師守之並可添設釐卡祈卽察酌辦理爲荷李質堂尙無到滬準期揆帥咨函欲請麾下統率六營由揚州入洪澤湖臨淮直打至周家口肅清滄渦淮淝汝穎諸河以扼苗捻紛竄之路屬弟敦促成行議論絕大規畫甚遠弟亦何敢阻擋惟各營分扼蘇州附近湖河正當要地且老兄爲西路統帥籌防督剿亦未須臨敵抽調現在質堂未到暫從緩計俟常江之間軍情少定閣下或回滬一商屆時質堂果來亦可三面言明再行稟復揆帥尊意以爲何如

五月十四日復曾相

初十日奉初六日賜示謹悉一一連接探報忠逆全股於初二日由天長六合回竄浦口聲言過江援蘇巢和敢逆亦紛紛南竄頭隊已至無錫

江常無交界爲僞侍輔護潮四王之衆聯營六七十里忠黨又來決一死戰黃昌歧帶淮揚六營分布常熟東西湖及沿海福山鹿苑楊舍各口其餘各營與程鎮陸師進扼蘇城東面及嘉興北面各湖河來路均係前敵要地常熟江陰之間陸軍二十餘營離鴻章少遠三舍弟獨力難支賴有昌歧主持調度或可立足水陸將士和協一心皆昌歧之力居多昨聞吾師檄調過淮鴻章豈敢違令惟官紳士庶大小將領相顧愕眙似於東南全局大有關礙且蘇嘉蕩港歧出新到師船情形不熟淮揚水師戰事至今春乃得放膽若以太湖水師易之而令熟悉地勢人情之師船他往誠恐輿論未協軍事因而阻滯也李質堂尙未駛過九洲洲可否飭調該鎮帶六營赴臨淮其四營來滬或派員暫統或交昌歧兼管果全來滬抑或由鴻章商辦總之昔日蒙師門 奏派鴻章與昌歧統帶此軍四載以來贖治無間昌歧每言從此常願合夥不願分離真死生患難之交昌歧昨

得調淮之信憂惶無措吾師譏將意順兵心諒能體卹及此如必欲其去
或奏令鴻章偕往或卽不派太湖水師東下仰候鑿裁運米價值與上游
相等敝軍苦無現錢往糴皖糧近來添勇愈多餉需愈絀無法分解以應
沉丈之急適粵東解到釐餉六萬餘卽派天平輪船資送洋硝幸有續到
每擔銀十兩較土硝成色稍好尊處火藥亦絀祇有就地經營陳碩甫先
生昨來一見耳目步履尙覺強健先已請入忠義局又傳師諭商催赴皖
據稱遠道不便攜眷秋涼或造謁鈴轅鴻章當陸續致餼也蘇松減賦一
疏昨已會鈞銜入告秋後松屬須擇完善縣分試辦徵收過遲恐趕不及
復會沉帥

迭奉來示敬譎巢和雨花臺之捷爲之距躍劉南雲已同春霆進攻江浦
諒能速克聞天長六合一股亦全過江如乘勞扼斷浦口九洲竄路再
紮營進蹙南門城賊必益惶怖企待大功之成矣僞侍輔護潮諸王嚮集

無錫江陰之間聯營六七十里忠逆頭隊已到該逆合謀拒我月內必有大戰事舍三弟與黃軍門水陸二十餘營進紮常熟西路逼近賊巢如能將此股擊退再圖江陰當易得手程鎮欲攻吳江隔水太多尙須設法麾下離敵軍約三百里雕剿夾擊勢固不能然雨花臺要隘既克忠酋當兼顧老巢不敢專意援蘇顧公時時驚擾之使其畏首畏尾仰戴威庇曷有其極筠公以蒞政不易翻新徘徊未去尊意允撥二千人藉其餘潤以贍雄師姪恐二千人尙不能自求口食淮鹽爲卡釐所困成本遂重無可生發南北兩網被人把持淨盡不知何從籌出大饒請勿爲紙上空談所惑也頃粵東轉解六萬餘金已派輪舟速遞安慶尙可分濟我公之急日來戰狀仍乞詳示

五月二十一日復左季高制軍

皖南北竄賊均已擊回尊意宜布長圍逼聚海角收功一隅見在局勢似

已漸漸湊泊嘉湖蘇梗稻之鄉農田尙未盡失業羣賊恃爲憑依不比他處得一城則各城瓦解也然吳越各軍果兩面兜擊諸悍酋一離巢穴必仍由宣歙竄江西聚殲殊未易言江軍不甚可恃所恃劉廉訪席觀察扼其阨塞耳傳聞金陵水西門下關一帶賊營被水師隱盡果爾則北賊南渡之路已斷若能截成兩楗收功較速李泰國兵輪船已到一隻七八月間如金陵未克必駛往助戰逆勢積衰之餘尤畏開花大礮似一二年間東南巢窟可悉平矣李秀成聞帶二萬人至蘇敵軍進偪城下亦未出戰或又謂其留守金陵形蹤甚祕伎倆亦復止此甬東洋兵有遣撤之說確否若輩貪利狡猾究其國之君臣未有占我土地之意仍視我兵將之強弱爲向背有雄帥就近撫馭之當無後患此間法酋則豪無能爲英人極多其隸常勝軍者不下百數十人尙守中國軍令事竣或易遣去惟兵輪船係中國購定所僱英兵六百名人與船不能相離目前既增糜費日後

頗難處置思之憂灼

五月二十五日復曾沅帥

連接初三初十日手教尅期大舉氣勢百倍旋得各路探報雄師會合楊
鮑兩軍門迭毀七里洲下關九洲洲一帶賊壘擒斬淹斃數萬江心天塹
拔幟先登偉哉亙古之盛業不世之奇助也驩忭贊歎中外同聲受傷之
洋匪逃回滬上者驚詫將軍自天而下謂用兵神速不可思議足令羣酋
俛首鴻章亦藉席餘威夸耀彼族從此金陵老巢當易破滅天殆假我公
以斧鉞殲此逆渠耶侍輔湖護諸酋連營六七十里江常之間與我軍對
壘環伺三舍弟同昌歧軍門劉郭二鎮合謀乘夜偪賊紮營二十二三日
踏賊營六七十座擒馘逾萬追七十餘里直至江陰城下郭松林部將傷
亡各一而松林手刃至百數十人滿身白衣逆血濺盡真壯士也忠逆聞
在丹陽前顧白門後瞻吳門有進退狼狽之象願我水陸各軍乘其衰敗

而盛之彼精銳漸亡不走必散迨餘衆瓦解則如秋風之振林葉耳公與
鴻章其交相激厲勉赴事機今年皖南北皆竄不出此賊有必滅之理但
不敢謂吾師所部曾左李三將卽能滅之以自誇大也苗頗耐戰恐非唐
成蕭毛諸公所能掃除希公病莫能興令人焦念吳漕浮額已與師相會
疏奈筠兄過江無與成斯善舉劉黃二公才識較短爲之四顧旁皇季帥
予聖自雄不可一世亦喜陵轢儕輩蔣蘄泉銜怨入骨其他聞亦難乎爲
下師門與公休休容納但使江路大通九洲設一釐卡當可贍貴軍之
急今之良臣外之流氓必不敢再來攪局鮑軍擬進何處除壽六外別無
雕剿或得過江進薄東壩與敵部可漸漸夾擊尤爲企盼高郵胡巡檢已
不提訛搶米案可了結矣

五月二十九日上曾相

二十七日奉二十三日手諭謹聆壹是九洲七里等洲之捷江路大通局

勞漸固各軍漸漸逼緊不使潰竄他省一二年間可望聚殲吾師平吳滅賊之功權輿於此忭慶無量鮑軍南渡是否進東壩深水一路則與蘇滬各營有聯貫之日於金陵蘇州在腠理之交尤所企視三弟與昌歧會督水陸二十二三等日攻破顧山西去賊營七八十座追逐百餘里侍輔護潮諸僞王之衆損折踰萬忠逆先駐丹陽接應兩端二十二日復率敗賊進蘇城徧貼僞示聲稱分四大枝竄撲浦東崑常江陰各路鴻章諄屬嚴陳高壘以待之彼固膽怯似亦無法冲突戈程兩軍已借雇小輪船四隻欲襲吳江直搗太湖俾其筋絡不得舒展惟亢陽太甚軍民疫死相望於路恐須入秋行戰乃宜耳賀堂尙未來滬昌歧固畏淮苦此間實係萬不可少之人前吳紳有公呈籲留附呈鈞鑒王東華勇略俱優但淮揚各營頽頽已久未必服統俟質堂到後妥商奉報酷暑伏維珍衛起居不宣再去年來蘇作梅以室家相託其長子琦廉樸能治事作梅頻年在外眷

屬流寓裏下河均賴其奔走衣食鴻章亦時爲接濟前委辦室山釐卡忽中時疫一霎而亡其全家十數口流落寶應無人照料妻病子幼亟盼歸來除再專弁賚送百金以資餬口外並專函敦趣作梅卽日東下惟久不接其來信未知行蹤又在何處敢乞吾師探明加封由驛速遞儻更便中商催尤感厚誼

六月九日上曾相

二十九日肅緘計已達到李泰國兵輪船章程總理衙門條議甚妥惟接准來函該酋氣餒仍未少減中國兵將上船學習終不免受其魚肉前奏派蔡國祥統帶是否無須更換何時可以派往暨酌選何項兵勇上船之處均求師門核定掣銜飭遵此事有李泰國主持引用英國弁兵六百餘船礮又非我所素習總理衙門乃欲派一總統以分其權又奏令吾師與鴻章節制調遣謂可隨時駕馭不至授人以柄豈非掩耳盜鈴先將總

理函稿鈔呈台鑒想亦有信致尊處也鴻章擬將所派兵將離遠分權之實在情形剴切告知容再錄呈李曾尙未到滬輪船亦未入江所喜九洲下關克復我軍可以合圍金陵無須該船協剿彼亦無可挾制或遠或近若合若離當能相機操縱滬上西人近頗馴靜如無李秦國擾擾似亦漸上強臺兵船一事須賴威望鎮服方有端倪應派何員乞速裁奪忠逆聞金陵緊急又已西去蘇城添募洋人數十教練炸礮或云白齊文投入蘇賊軍士疫死者甚多艱難進攻侍輔護諸賊仍踞江常之交現撲楊舍與劉銘傳一軍挑戰亦無能爲江陰令救渡難民通州牧搜殺奸匪都帥先後劾奏臆小張皇無當事理此老近頗乖張不似在上游時尙有豐鎬遺風也吾師曷弗一言爲地方造福鴻章責任僅能管及南岸更不敢輕議老輩前二事官紳士民公論甚憤奈無主持公道之人耳筠僊此行慮有觸忤不若留署薇柏一席可與商籌減賦大政馮敬翁輩屢以爲言鴻

章亦極欲攀留未知師意云何或 奏派黃南坡來管榷政而以筠老署
蘇司兩有實濟如以爲可請卽主稿入告郭遠堂祈催赴任 樞廷深贊
其才恐於蘇漕利病未甚了澈松巖以此局關係極大不能獨任亦係實
情其規條節目須兩年乃定但不可無任事之人鴻章智慮短淺無力兼
顧希亮督天有旱象皖楚何若兵災之後須祝年豐

六月十六日致曾沅帥

連奉五月十八二十六二十八日賜函詳悉戰狀爲之起舞昨於濟關賊
館奪獲僞文書數百件大都金陵賊館乞蘇浙解濟銀米其聲甚哀內稱
洪逆禪位幼主盡黜洪氏之黨封忠王爲軍師留守城內各僞王均歸調
遣現調侍護等王來城協守欲進紮小南門東門一帶保護糧運惟城內
本無米舖自江路不通米價長至十二兩一石牌尾日發四合僅有三岔
河寶堰一路可運糧進小東門暫於該處紮營設棧夫轉運若官軍再進

調蘇浙各賊赴援皆爲滬軍所牽似有窮蹙之機弟令程鎮學啓與洋將
戈登進攻吳江幸已克復程軍分四營守之李鎮水師卽至便可圍入太
湖扼斷蘇浙中通之路而剿其腹地使之不敢盡趨金陵劉鎮銘傳日內
擬與三舍弟分隊進圍江陰惟地廣兵單置守不易都公酣臥揚州坐糜
重餉從前猶藉防北窺爲名此時楚軍上下夾擊若稍有天良當撥一旅
而南協助戰守乃欲引疾以退其志可知此軍應歸揆帥調度鄙人不便
攙越惟江陰救渡難民通州禽殺奸匪皆地方官應辦之事並無過舉都
公迭次張皇入奏至通州一案尊處緣局外之先發亦附會其詞而媒孽
之蒙所未喻我輩糾察屬吏須順民心之公是非如以意見爲是非則賢
者無所趨向不肖者加以揣摩是致亂之本也聞官紳團練噴有怨言執
事當與喬方伯善爲彌縫以厭衆望否則弟固不能無異議耳裏下河民
氣浮動此等重案不下辣手復將何以挽回叨在心交敢進忠告伏維鑒

亮苗逆陷壽州揆帥屢催黃軍門赴臨弟以該水營正在圍攻蘇垣分剿江陰暨難抽調茲蒙檄催黃殿臣礮船百隻速赴懷遠移緩救急斯爲正辦唐義翁餉絀可念江北米捐應有漚上一分迄今未見分毫實惠昨甫於喬方伯批中微諷之尊意撥歸臨營可謂憐他人之慨然弟與老兄何肯強分畛域鄙意不必奏明彼此咨商定案若以塞朝命附片立言乞聲明出自吾皖人之公心較大方也

六月二十五日上曾相

作梅十六日抵滬接奉十二日手諭敬詢起居暑福惟畏熱更甚今夏酷暑較勝往年新秋薦爽伏維體中多佳餐衛咸宜至以爲祝金陵自宜漸圖合圍援賊不過侍輔護諸黨屢挫之餘精銳殆盡人數卽衆實不耐戰沅建諸軍必足制之洪逆留忠曾督守將來能於石頭城中殲此兇渠則東南之事可漸定矣前見忠逆僞文調現守杭州之僞歸王鄧光明洋礮

隊五千赴金陵歸逆以有富陽牽掣不允今吳江既復嘉杭喫緊更不能
去鄧光明屢與敵軍鏖戰於四江口福山等處其洋礮精悍爲諸賊之冠
如擠之蘇浙不令西援亦於全局有裨江震復後十六日杭嘉之賊大股
來援二十二十一二十二等日蘇州大股來援均被程鎮擊退現僅能分
四陸營一水營守之距蘇太近加以白齊文餘黨旬結勢誠岌岌李質堂
尙未到滬其水師甫到五營主將未來軍實未備難遽調遣須候質堂來
可商救吳江之急昨夾浦前敵被圍賊中施放開花彈中傷舢板戰船一
隻顯係白齊文作祟又搶去戈登所用高橋小輪船現爲保守蘇州開幕
逆封爲貴王懸賞一百萬包打上海英法各文武皆抱不平共圖防禦擬
俟太湖水師到齊約會程戈各部猛攻蘇垣趁其軍火未齊羽翼未成希
翼轟散彼族設不得逞於蘇滬或挾西人槍礮援解金陵之圍祈密屬沅
丈有以備之昌歧業與劉銘傳三舍弟約攻江陰多方擾之西路無淮揚

水師輔車無助誠恐決裂昨仲宣漕帥來函已派黃鎮開榜礮船百隻赴懷遠協剿有此助兵唐中丞似可自固昌歧聞北去甚餒鴻章竊料江南各路攻剿均正緊急陰陽交戰危疑之際有增無減方振士氣儻因抽撤偏師致贖全局亦師門所不取也大舉征苗似須金陵蘇杭有一得手分陸軍勁旅一支與淮揚水師頡頏而前其勢方足以制苗此時希部退紮卽昌歧帶六營助守臨淮其所以勝於黃開榜者幾希各路戰守之局想吾師思之熟矣鴻章非敢違令徇昌歧與吳紳之私而忘桑梓與義渠中丞之急惟所值軍情時勢有萬難鬆勁者不敢不再三瀆陳伏乞亮督李秦國勅索輪船欠銀四萬稅不足以釐益之戈登以白齊文投賊懼常勝軍被其煽惑需索多端暫無以分濟皖軍殊深愧歎彼兄來信粵東大府欲分留釐餉四成兼以該省官場風氣固殊意忽忽不樂欲於年底引疾作梅云師意商令回江籌餉渠與幼丹甚相得幼丹來函亦頗以改粵爲

憾若一轉移或於皖餉少助亦未可知再求安酌郭糧道聞留尊處辦營務如於蘇政無益不來亦佳箴軒既可赴任乞趣其速至否則鴻章當一奏催筠公去後劉黃諸君更覺麻木不仁足見書獄之可貴矣漕帥函囑鴻章商催都帥進兵此軍非蘇撫所敢與議都公本領到揚後日減日壞若便引退務乞吾師改絃而更張之或不虛糜裏下河百餘萬之餉漕函呈電

復曾沅帥

溫委員回滬奉十四日手示並詢悉貴體偶患暑疾漸已復元襄鄂精神天必助之壽州陷後希公所部退守三河尖六安州聞苗逆伏而未動義帥臨淮孤注雖甚可危有厚雪二公舢板四十號黃開榜礮船百號往助當可扼其沿淮東竄之路金陵蘇杭三城皆攻剿喫緊之時且可互相牽制兵力宜增不宜減須俟三城有一得手機勢少緊再酌派勁旅北去合

力討苗似兩邊皆有實濟未知公意云何西人用大礮攻城實爲神妙但須大小開花礮十數尊又有放實心彈巨礮二三尊庶高下並落中邊俱透使其壕樓盡坍立腳不住然後以選鋒豎梯而登萬無一挫如聚寶門一帶城極堅厚非六十四磅重礮子並能食此子之礮斷難不倒此物中土罕有敵營所能設法購得者僅止十二磅開花子之礮數尊而已劉鎮銘傳欲攻江陰近始在番船購覓三十二磅子之礮二尊而開花子尙須另鑄且未知合式與否至敵部惟劉程二鎮及張遇春營中弁勇有學此礮法者然皆賴洋人幫同動手臨陣較有把握再學半年或可出師承屬撥解數尊諸軍俱在前敵日有戰事暫難分解俟多獲或覓得六十四磅以上當昇致之惟其器具之繁瑣精妙處總要一二西人掌其繩墨耳白齊文募流氓舊部二百餘人投入蘇城帶有炸礮五尊賊中給數十萬金爲購槍礮現雖飭各營卡查拏頭頭是道偷漏仍多程鎮留四營守吳江

蘇嘉兩路之賊時來圍擾幸已擊退久必難支擬俟李質堂所部到齊當合諸軍進攻若相持至三五月後白逆所購洋礮齊備不獨松滬之患且貽金陵之憂逆計已窮行傾蘇嘉之橐以求洋匪與我一擲亦天意也幸英法酋長明攻之而不暗助或有一線轉機

李文忠公朋僚函稿卷第四終